

鄉縣志卷第二十九

循吏傳

女靜之吏悃悃無華然非肆應之才不勝繁劇之任新鄉地處
通衢號稱難治隋唐而後循吏幾人載在簡編可考而知也一
時德政之碑千秋俎豆之祀苟無遺愛必無去思清慎勤 熙
世命官要旨果達藝聖門從政良才前輩官箴可爲縣譜凡在
有位敢不勉哉

唐陸瓌字仲采吳人舉明經補長安尉以清幹稱開元初年中朝
子弟不任京畿改授邑令廉直有惠政邑人爲立祠以按察使宇
文融薦遷澠池令

李頎東川人進士開元時爲縣尉文章政事見稱于時有詩集傳
于世

新編縣志卷二十一
許作梅曰漢室循良爲盛其時新中鄉尚未置縣故宦績不彰
自隋立縣而後李唐至今千有餘載何名宦寥寥也卽在近世
亦僅留姓名豈吏治不古若歟抑考稽未詳也李東川頎以縣
尉而名傳不衰信三不朽事業惟其人不惟其官耳新志於官
師之賢者一善必錄不從諛焉後之觀感於斯者將虎渡雉馴
筆不勝書矣

附錄李頎欲之新鄉答崔灝綦母潛詩數年作吏家屢空誰
道黑頭成老翁男兒在世無產業行子出門如轉蓬吾屬交
歡此何夕南家擣衣動歸客銅鑪將炙相歡飲星宿縱橫露
華白寒風卷葉度滹沱飛雪布地悲峨峨孤城日落見棲鳥
馬上時聞漁者歌明朝東路把君手臘日辭君期弢首自知
寂寞無去思敢望縣人致牛酒

裴子雲爲邑令和易近人而蒞事有斷制邑人王恭戍邊留犢牛六頭於舅氏李璡家五六年產犢三十頭恭還索牛璡曰爾牛已死二止還其四恭訴之子雲收恭于獄召璡至詰之曰賊供盜牛三十頭藏汝家汝同盜耶令引賊面質璡惶恐曰家有牛皆甥王恭犢牛所生實非盜者子雲乃喚恭出以五牛酬璡餘悉還恭人服其神明

宋邵博字陽淑陽羨人大觀間宰斯邑才穎廉利人吏在庭若履冰上期月庶政畢舉巡視北郊至衛河見民病涉殫心籌畫創建石橋事成而役不擾民思其惠名曰邵公橋至今利賴之祀名宦金張簾大定時爲邑令二十八年二月以河水入城閉塞救護有功與縣丞唐括唐古出主簿溫敦偃喝俱遷賞有差

元李璋字君章山西襄陵人至元間爲尹以廉敏稱案牒鱗集剖

斷如流監司委以疑獄輒立剖有所鋤抑不復隱卹境內大治去任民爲立碑祀名宦

元淇南賈宗傳記夫守令蒞官三載能以清白著去則有遺愛而民思之是良守令也新鄉土大產繁實爲巨邑或謂俗尚慕興訟猾民挾奸欺好持吏之短長頗稱猾訐臺省亦信以爲然襄陵李公來茲邑未幾大治三年之間政成化一近者代官在廷公治裝促行闔境黎老咸咨嗟悵慕不忍釋廼謀鐫石以壽公名余樂爲之書自前令姬君去職後值王師南征縣當兵衝使者旁午供億送迎不給豈暇撫字設施公至人或以酒殽進却之衆謂不情冰霜心事久而益徵每晨署理政抵暮始罷以爲常監司有疑獄付公決之甚協執法者心聖廟囂穢尅俸充材爲士民倡廟貌卒美觀驛舍不堪傳遞大更新之廳廊庖庫

舉脩飭且又置四門之橋梁課境內之農桑城隍兩岸植柳萬株其悴神于小民也旣勤矣其居官嚴明若神其去也若雛鳥離母甘棠隋淚不足喻也公諱璋字君章大同天城人官於襄陵因而家焉正隆名臣尚書左丞之四代孫至元十三年三月劉理北直南宮人至元間由江漢漕幕來爲縣尹幹敏有機警均賦役杜私謁勸課農桑獄訟不留嘗捐貲修學暇則親師儒講說禮義有古循良風秩滿民爲立石祀名宦

元按察使王惲序衛之屬邑曰新中鄉其地距太行東麓浸以清泉之潤桑土衍沃民俗殷阜自昔號河朔望縣惟其物衆而俗囂路衝而務劇故治稱爲難至元二十六年南宮劉君理由江淮漕幕來主縣治君資幹敏有機警旣視事思有以事集於上民便於下於是舉條章明約束均賦役却造請凡轡馭之急

遽者一馴而致之不務高遠率先以身爲度縣當關陝驛種
使相望於道吏民疲于供煩君量其重輕處之有方乘間侵剋
之弊日就歛息廨舍一縣具瞻陋損不堪治事度材庀工易故
而增新葺者十餘楹復構蕭相祠俾吏曹有所景慕邵公檣就
以將傾乃鑿石復爲修補方之舊締旣高且固役不知勞而免
病涉至治平道路填污夷峻徒行輦至恒不少虞誠時勸農裹
糧自隨周行田里未嘗呼集俾妨時作耕稼蠶績檢括課視切
于已私復喻之以勤儉申之以孝弟使遷善而遠罪由是邑里
感念奮然勤力生理日有滋益下逮鰥寡顛連亦適厥所流移
聞之稍稍復業故賦稅輸納不及期而辦詞訟繁囂不俟約而
簡後又捐出已資崇飾廟學輪奐一新人聳瞻仰暇則禮師儒
率僚吏暨邑之子弟聽其講說使知禮義故三載間庭無留訟

至鄰有疑獄讞治而未決者上官倚之剖決辨明則於縣之治
否可知已君旣更耆舊孫祐慕賓等有思罔置來謁文以垂示
於後遂狀次第之嘗觀兩漢循吏政績風化子視生民訓誘惠
養如恐不及藹然有三代風有起思樹碑以表悠久追思之意
非幸也宜也迨叔世司牧者苟簡貪墨習爲當然於民之休戚
漠然如秦人視越人之肥瘠甚者困之以更張臨之以刑勢糾
民之財膏其身傾民之產肥其室使民畏之如豺虎惡之如寇
讐告訐謗讟無所不至以理勢論之非刁也亦宜也今劉君以
勤強幹敏力矯斯弊致吏民稱道如是可謂能矣是宜銘 銘
曰天下之事孰覈孰綜政發於上相臣是控相須成務匪令奚
共雖百里間務實繁關有社有民有賦有貢期會簿書風俗獄
訟我剖我決我承我奉越惟良能治之有統于室鳴絃五袴流

頌暨我劉尹事功自憊挺身頽流卓爾爲治瘼自我蠲聲由實致所以懷思去而罔替大德三年正月六日

李思敬字克誠山東齊東人泰定丁卯爲主簿傳驛梁路脩治一新舉經明行脩者爲社師躬自督課成就甚多吏卒撝斂弓手蠹民悉設方畧禁之已已歲饑朝廷命使徵楮幣三萬五千繕協濟鄰邑思敬徐請曰新邑亦饑未合從井救人也情詞愷切使憫其誠爲留帑以活民使歸具言于朝得蠲租之半至順初又歉且蝗以計捕之遂獲有秋祀名宦

元總管孫公懋記簿佐之職有能存心愛物者蓋不多見李君思敬字克誠齊東人少譯新語由翰林擢充侍儀司譯史調冠州監務授從仕郎新鄉主簿泰定丁卯始供厥職其所領傳遞梁路修治一新非他邑比常患社庠乏教舉經明行修之士爲

社師吏卒下鄉掊歛習爲常及見役弓手本以防寇或反蠹民
公設方畧悉禁之已巳歲饑朝廷命使賑濟是縣楮幣三萬五
千緡欲濟他邑君叩請曰本邑民貧乏者衆倉卒失申報使嘉
其誠允之夏秋不雨苗槁吏莫敢申君歷鄉村遍行踏勘移文
于上其年秋稅蠲免至順改元蝗蝻飛布害秋禾君設法監捕
勸豪家發粟供食閱月捕擊始盡其年秋大稔自下車清廉苦
介三載之間吏畏民懷興利除害不克盡錄先賢謂一命之士
苟存心於愛物於人必有所濟於李君見之於是書碑刻以示
方來至順三年三月

明胡南溟洪武間任時當草創從容區畫如無事而邑大治以最
遷

王讓湖廣江陵人洪武初爲縣主簿撫流移課農桑脩廢舉墜政

行化洽民德之祀名宦

李驥字尚德鄆城人舉洪武二十六年鄉試入國學居三年授戶科給事中尋坐事免建文時薦起新鄉知縣招流亡給以農具復業者數千人內艱去官民相率奏留者數四不許服闋改知東安擢刑部郎中歷御史授河南知府

見明史

曹睿山東兗州人洪武間任祀名宦

許宣宣德間任沁水潰決邑處下游水深成河築堤以防不能捍禦因請堅築決口俾由故道旣蒙俞允得成保障之功

見明史

王政順天人景泰間任祀名宦

李義壯直保定人景泰間任祀名宦

侯麟景泰間任祀名宦

康熙續志曰明初殿最從嚴吏治蒸蒸若曹王諸公業已光生

俎豆意其政蹟必有卓卓當世者年遠編殘竟湮沒而無考惜哉謹錄姓氏以俟搜求

張拱南直壽州人景泰間任素性慈仁政尚寬儉人有過當笞者但喻以理終不忍下鞭箠去後民謳思之祀名宦

楊清字克廉山西平定人正統辛酉舉于鄉授陝州學正天順間以廷臣薦擢縣令明敏果斷吏胥不敢舞文新學校課農桑聽訟平允囹圄嘗至空虛每周行隴畝呼老農問所疾苦事有弊於民者輒默計除之民陰受其福不知也秩滿陞山東兗州府同知

姚江徐律頌惟海隅雍熙生民咸遊化光郡邑循吏於古特盛顧才良政羨莫新鄉楊侯若也侯山西平定州世家生而敏闡夔乎出羣掇正統辛酉高第授陝州學正文化丕變秩滿廷臣舉之任茲邑民荷撫字飲和春臺中數載矣懼侯一去失瞻怙

遂述侯政蹟與余言刻石以昭不朽余惟楊侯以清白約己以簡重接物以強毅立事吏胥不敢舞弄囹圄嘗至空虛視民之害默計除之下車首葺廳治以嚴號令新學校以振士風勸課農桑敦厚風俗城郭完修祠宇飾麗百廢之舉與夫供億征輸未嘗少爽此特三年之治耳再借寇君則綠竹之咏得不復作乎侯名清字克廉其學政之著擢用蓋未可量云乃爲頌曰
鼎賢侯懿茂清醇才隆治教學富天人風岸嶄立器度凝遠黎庶具瞻侯來何晚我寒我燠我饑我飽農恬於野婦順於廬如彼早曠甘澍斯至輪月當空四靜纖翳德馨猶蘭謂能其官彼隘弗容侯量槩寬以正養蒙侯實告詔真情所鍾惟是學校董狐世遙疇紀侯蹟徧觀在土侯乃作則侯乃作則民曷敢忘鑠之琬琰託於文章

王素字繪之四川洪雅人以鄉舉令潛山移知縣事威愛交克課士不倦及大比入穀者四人一時稱盛值大水衝決伐木具舟所全活無算有巨盜近畿殺人亡匿邑中捕獲之械至京進六品俸陞階州知州民爲立碑祀名宦

楊廷和記新鄉令王侯之報政也有二三父老道侯之德於民者曰吾邑爲南北衝爲吏多不任侯至獨勤其職問民所欲惡而罷舉之再踰年百廢俱興費不侵官力不損民成化十八年邑遭大水爲患人多溺侯伐木具舟全活者千數貧者賑之二十一年有巨盜殺人近畿亡命於吾邑塊村營侯率民兵捕械之京師進六品俸於學校日省月試不懈鄉舉連四人政暇辦他郡疑獄久不決者其民德之猶吾邑相率言於部使者欲得侯守衛輝今滿九載侯終不可得留其行也曳履以志不忘余

因嘆曰天下爲令者多矣惟新鄉有去思豈邑之民獨厚耶使天下之令皆侯則侯無足多者何都郡森羅咸敷教令牧黎元而獨使侯寥寥然爲稀宿耶是宜碑之以標甘棠庶有以繼侯者侯名素字繪之蜀洪雅人以明經舉鄉初令潛山再移新鄉云

范鏞陝西人弘治間任教諭學行兼優士類景仰中進士累官都御史祀名宦

儲珊字朝珍南直潁川人弘治己未進士初任清江再起蒞茲邑詢民瘼理庶務迎刃以解有能聲他邑矜疑之獄咸委決焉值歲大旱民心洶洶珊沐浴虔禱旋大雨民賴以安學校城郭廢墜者次第修舉其他惠政不一秩滿擢監察御史

江浦李錦記代天子分職者守令最重焉以親民得行其志也

新鄉令不知幾更在元惟李君璋劉君理國朝惟楊君清王君
素銘其愛今我侯儲公以博學明經登弘治己未進士初任清
江再起授是邑詢民瘼理庶務迎刃以解他邑有訟上官咸付
侯決之其才練更軼越前四公茲當考績期耆民郭英等知公
旌必不可復返迺謀紀厥政于石焉惟公寬洪凝靜剛以御下
恕以行法境內民情靡不周知時五月亢旱民急公沐浴請禱
大雨如注穀大熟儲蓄充積公庭爲楹百餘不費公帑譙樓暨
旌善亭申明亭宣化坊咸所剏建且修泮宮固城郭設理刑廳
弘養濟院司府館舍類舉規制偉觀是彰彰可紀者余故錄之
以俟觀風者若深愛淪浹則吾民之心壽於金石是何侯予言
也公名珊字朝珍直隸鳳陽潁川世家

馬朋陝西咸寧人嘉靖二年由舉人任教諭師範端嚴篤學善誘

所成就甚多有巡方使者謁廟值雨將拜堂上朋抗聲曰拜下禮也御史悚然復位擢南康府同知陞晉府長史祀名宦

方承恩字龍川湖廣大冶人嘉靖戊申冬由貢士授邑令平易近人興行文教創鄉賢名宦祠朔望聚士子講藝夜分不倦然不邀士譽也邑舊有被誣久羈者七人至是力白恤刑使得省釋邑故民王恕婦孀居子甫七歲夜有豪宗拋嬰兒于其後園執匿名紙誣訟之承恩曰寡婦果有私孕產于暮夜誰當見之且胡不遠棄乃使人得踪跡耶匿名文書時有明禁卽以造言之罪罪之婦行全其他抑强暴招流移修廢墜善政多端民感德爲立生祠

張範北直靜海人隆慶四年以貢士授邑令明斷有治才時學宮傾圯甫下車卽捐俸修葺巡視城垣甃以磚堞不煩賦修民利賴之祀名宦